

晚晴移詩匯

晚晴簃詩匯卷九目錄

博爾都 二十三首

塞爾赫 二十三首

文昭 二十六首

晚晴移詩匯卷九

徐世昌

博爾都字問亭號東臯漁父輔國愨厚公培拜孫襲輔

國將軍有問亭詩集白燕棲草

汪堯峯曰先生貫穿經傳錯綜典墳而又深研性命之旨博求天人之源先生之於道誠不足窺測其所至若其近體之精新歌行之雄放所謂載道之言亦既誦而屬和其一二矣姜西溟曰先生鍾天潢之秀朝詣闕下閑行郊墅非有幽深汗漫詭特之觀足以暢發其心志也然一下筆居然有重山疊波烟雲

洞狀

之勢

詩話問亭將軍系出太祖與紅蘭爲再從昆弟居東莊有楓莊爽園諸勝阮亭純翁愚山其年大可蝶園梁汾稱長諸君皆從之游詩以疏雋勝其近體佳句如東臯野望云野色侵衣冷窸窣聲入戶喧雨後坐開園云密樹含風冷歸雲裏日斜題友人山房云窗落穿松月簷飛度水雲東臯秋夜云窗前敗葉隨風舞籬外寒流帶月明喜晴云門靜塵隨車轍淺階前苔逐屐痕生甕山云留人燕語停新幔携子輕鷗宿

淺沙卽景
懷辭近旨遠

秋夜

閉戶無塵慮幸免事干謁賦性實魯鈍壯心竟消歇天際
來冥鴻飛鳴度城闕聲響一何哀依依清人骨顧我東籬
菊露重香不發獨坐抱玉琴披篋待寒月

披萊覓高士暮歸霜滿天東山月始上萬籟已悄然花氣
滋秋露漏聲滴寒泉思就壺公宿凌風共周旋

送苦瓜和尚南還

涼雲日夕生寒風逗秋雨况此搖落時復送人去飛錫
竟何之遙指廣陵樹天際來孤鴻哀鳴如有訴敗葉聲蕭
蕭離思分無數登高欲望君前津滿煙霧

題葉季良小像

樹老香還幽人閒地亦靜澄波浸山色修篁篩日影時有
雙白鶴飛來上漁艇

薊門

燕關一夜西風生黃雲吹墮漁陽城翦燭無言起愁坐萬
戶千門惟月明忽聽天邊笛聲作隱隱隨風度羅幕鴻雁
遙從塞外來月明倒影樓頭落闌干倚徧夜婆娑楊柳曾
傷攀折多玉笛能傳千載怨秋來愁聽武陵歌

松化石歌

吾家有奇石乃是松所化空谷幾千春移來傍亭榭園林
從此多清氣蒼蘚玉節依然存日斜窗外滿寒翠月明簾
下留層雲我至盤桓長手撫似帶幽巖舊風雨虬枝無復
波濤驚霜皮半染莓苔古錦紋素質寒菁蔥階前彷彿山

靈通只知今日成黃石那解當年是赤松

答友人見懷

憶爾清風夕懷予定有吟悠悠東去水不及此情深爲覓
無聲句酬茲太古心來宵新月上待爾再彈琴

寄懷汪鈍翁

故人三載別煙樹杳重重歸雁雨中去裁詩花下封嘗同
卧山館空復對雲松猶記題名處玉泉最上峯

潞河曉發

畫鷁鳴晨鼓荒隄起曙鉦推窗看月卧掛席破煙行村遠
連沙白林昏接水平翛然小意靜眞覺萬緣輕

務閒

務閒乘小艇隨意下清湍霽雨夕陽寺秋風紅蓼灘沙明

蛩語急雲薄雁聲寒盡日無人識煙波伴釣竿

送馮文子南旋

文子南歸日聳身騎白龍凌風一長嘯飛過九華峯齊魯
關河湧淮陽雲樹重他時如記憶吟詠寄囊封

詰旦唱驪歌清秋奈別何寒花孤驛少哀雁大荒多揚子
乘風渡康郎冒雨過草堂雖好在遮莫滯煙蘿

蕙帶束奚囊飄然向草堂近窗惟藥竈比舍卽漁莊細雨
沾苔滑高雲覆院涼幾年棲隱地松菊未全荒

寄懷王掄客

憶汝遙羈鸚鵡洲半生寥落被羊裘百篇投老情猶壯三
寸徒存策未收夜雨瀟湘蝴蝶夢秋風鴻雁稻粱謀天邊
黃石何由見脈脈慵登尺五樓

送素庵監牧口北

分手河橋木葉黃
白沙衰草徧橫塘
月明回首人千里
磧冷驚心雁幾行
玉塞雲深堆苜蓿
銀蹏秋老破風霜
居庸翠湧羣峯秀
定有新詩貯錦囊

送華子千南歸

對酒離懷且共寬
那堪匹馬出長安
煙凝春草荒城暮
雨溼輕颿野渡寒
幸有雲山供過眼
祇憑僮僕勸加餐
知君不慣塵氛苦
好向清溪把釣竿

送顧梁汾南還

雪霽郊原映翠微
紅亭分手欲沾衣
春風古道人歸去
斜日荒村鳥亂飛
長蕩鶯花隨處好
平津車馬與心違
何年訪爾空山裏
相對清齋學息機

南苑

城南御氣動，昭回羽葆參。差帳殿開，落日歸來盤馬埒。春風吹上，晾鷹臺長楊苑側。金笳發細草原頭，畫鼓催自有詞人誇羽獵，眼中多少上林材。

萬柳堂

高堂翠繞柳千條，振策登臨入絳霄。日影漸移雲覆檻，泉聲不散雨過橋。山盤曲徑看人小，花布重陰隔市遙。莫怨章臺攀折手，月明還有客吹簫。

寄懷梅耦長

帝城別後竟誰依，知向江干暫息機。雨過漁舟當戶集，秋深沙燕貼窗飛。愛看水月宵移櫂，靜憇松陰晝掩扉。幾欲寄書征雁杳，空教翹首對斜暉。

雁

零露冷汀洲歸鴻度小樓秋心齊喚起不止動邊愁

桃花寺

山寺憑欄對夕曛寒煙暮靄互氤氳數間茅屋圍紅樹一曲清溪出白雲

東臯泛舟

乘興蘭橈泛碧溪漁歌驚散水禽啼白蘋渡口煙初暝紅蓼灘前月又低

塞爾赫字慄庵一字曉亭號北阡季子誠毅勇壯貝勒穆爾哈齊曾孫封奉國將軍官戶部侍郎總督倉場有曉亭詩鈔

沈歸愚曰曉亭遇能詩人雖樵夫牧豎必屈己下之固以詩爲性命者也辨唐宋之分如淄澠有佳句云

一水明殘照孤村入暮烟宋朝
南渡君稱姪周室東遷帝是侯
詩話曉亭將軍系出類祖紅蘭
詩鈔四卷各爲集春雪三餘懷
累任大僚晨夕佔畢如儒生乾隆九年高宗幸翰
林院選詞臣三十人侍宴賦詩非甲科雖公孤不
得與特命將軍以宗臣侍明年宴瀛臺亦如之時以
爲榮遇其詩氣格清曠風度諧婉五七言近體如柳
深陶令宅路閣謝公村高風敬雁陣落葉滅庭陰風
欺孤枕人無夢雲過空山雪易成背山路斷人稀到
空谷風腥虎自來亦皆佳句因不儘如歸愚所標舉
也李鐵君爲作傳舉其恆言云凡事務快於支體則
心有未安理欲之分不可不辨又云鬼神與人呼吸
通吾期無愧而已是則藝進於道又非專治詞章者
所能望其項背居官廉介稱其生平二子立
齋厚庵並能紹世業詩鈔卽厚庵所編次也

廡青山人壑丹書屋初成載酒落之

新構米家船煙雲欣有託棲遲殊大厦我來先燕雀低檻
避驕陽疏櫺映叢薄江湖旣已遠波浪何由作畦蔬雜澗
蘋尊前花自落烏聲枯棹聲過耳兩不惡灌園有於陵看

山近南郭僮僕狎荆榛婦女甘藜藿手把一卷書偃仰無
愧怍沈沈淵底珠矯矯天邊鶴盤陰有輞川丹青徧京洛
綠蘿翳松篁罽塵阻巖壘此屋潞河隈誰識非臧壑

相逢行

三年騎款段不知牝與牡出門遇所歡欣欣共攜手問君
爾何爲僕僕牛馬走豔豔迎秋花濯濯當春柳昨日美少
年今日成老醜自無羨門術安能金石久舉頭仰華嵩低
頭望原藪一日薄三公千金重傲帚芙蓉霜作鍰驪驪龍
作友成坼黃河陰臂斷匈奴右隴阪長九折葡萄綠於酒
脫葉眷故枝柔絲牽斷藕慷慨老萊子畚鍤隨其婦北山
怨鶴鳴嘯能終畝畝

丁亥暮春游盤山便訪拙菴上人

風和隴麥青郊曠游目騁天際遠墟閒樹杪浮嵐迴新綠
靄叢薄雜花綴疏影詎憚輿馬疲終隔煙霞境逶迤巨壑
深泔澗飛泉冷石繡古苔斑鳥啼春日永雨餘林氣澄雲
歸陰岫暝託根層崖松無爲感潛穎夙慕山棲幽頓遣塵
念屏一徑緣西麓千盤凌絕頂紺宇禮尊宿浮圖落高景
次第辨諸峯微茫睇沙嶺披榛扣禪關閒房太古靜晚飯
摘山蔬烹茶汲古井坐對老僧言窅然發深省

秋日游東村

縱步副游情瞪目愜心賞晚霽愛澄川流光極潏泱豐年
蚤穀登閒原百草長陰陰迤阡陌鬱鬱叢灌莽塘迴蒲稗
深陂轉場圃廣境幽客意閒雨過山谷爽墟煙淡將夕沙
路平如掌孤村人未歸高樹聞蟬響

題畫鵝應樺村居士

大火西流風影疾昏霧荒荒沒寒日紙立孤鵝宛欲飛肯
傍秋風啄殘粒憶昔平原短草枯羣飛羣逐鎮相呼霜鷗
野鶴滿霄漢匿影不敢窺平蕪五陵裘馬紛馳驟閒擲干
金爭一鬪毛血易隨黃金盡可憐紈袴鵝衣後君不見漢
家從來重養士疇向疆場報恩死

夏日走筆贈隋海侯

隋侯潦倒燕市側家住山東古卽墨黃金揮盡重交游不
問生涯何稼穡平生磊落希古人湖海之氣風塵身年將
四十游汗漫薊門烟樹空陽春長揖甯知五侯貴椎埋屠
狗同一醉彭澤歸來羞折腰信陵甘執夷門轡君不見齊
人田單古英雄振策初從卽墨始火牛一發挫強燕頓復

雄城七十二翻憶燕齊未遇時英雄蓋代疇復知與君邂逅一尊酒問君今日將何爲燕山道路多嶽嶽煙雲變幻無定期嗚呼隋侯竟安適徒然結他日之相思

竹闌行

劈枝揃葉束復束循垣繞砌曲更複逶迤庭院轉深沈爲護新篁判舊竹新篁出土如新浴一碧蕭森立寒玉帶雨長連花徑紅籠煙橫鎖蕉窗綠君不見繁絲急管青雲端芙蓉水榭金勾闌風簾初捲芙蓉裏忽度秋風花已殘疏櫺草草蓬蒿徑閒對斜陽餘古歡

與任梅村曹烟廬豐臺看花

煙廬居士閒長晝時撥巖泉掃花岫家住西湖山水鄉筆端猶帶西湖秀梅村老人江湖賓雙眸炯炯鬢如銀人世

馬牛渾不辨，惟與海鶴爭精神。芍藥城南正放花，相期攜手入晴霞。花前爛醉熏風日，眼底徐看捲浪花。煙廬年少梅村老，我亦繁霜侵鬢蚤。未識誰堪金帶圍，鶯殘花落忘昏曉。

杏山行

杏山山上石帆巒，杏山山下水瀲灩。山前山後沙土紅，疑是當年覆軍血。憶昔將軍初上馬，羽檄交馳徧天下。貔貅十萬出雄關，遮日旌旗隘原野。畫鼓三通不交戰，虜策聲中轍先亂。二千鐵騎儼天人，大箭長弓一當萬。霜摧敗葉草偃風，血流海色波濤紅。功成不坑長平卒，祇今竹帛褒元功。吁嗟推轂竟何補，獻俘解縛拜聖主。有人東望尙招魂，衣冠昔葬燕山土。

馬

不識天閑路徒甘塞草肥有時衝雪去何處踏花歸苜蓿
三秋老風塵一顧稀更堪悲伏櫪千里壯心違

過鞏華題壁

廢郭夾清瀨孤墟生遠煙沙晴雙鷺下花暝一牛眠微雨
近寒食東風似去年客程方鹿鹿空對好春研

曉發撥洛那越新嶺至興州

馬疲愁跋涉客病卻登臨細路盤危石空山響怪禽感羸
頻握臂守默只齋心曉色旋成暮寒蛸時一吟

五日

蒲芽抽筍出晴波五日重驚塞上過豈不懷歸當令節誰
能遣此但狂歌連天細草初調馬捲地長歌一枕戈無限

心情兼客況十年空對舊山河

夕陽

東隅一望遠煙生自顧頭顱感未平
暗送馬蹏催倦客明隨鴉背上高城
三春雨後花無賴九月風前葉有聲
獨坐閒階惜餘景桑榆滿眼不勝情

夢覺

一枕秋窗夢未閒半生如醉獨蹒跚
逢時漫說平津閣往路多成蜀道山
豈有金蘭同臭味也知秦越共塵寰
羨門已去長房遠更向何人覓大還

秋杪喜大盜自滄州還

獨泛孤雲向海邊客窗誰與聽鳴蟬
滄浪一曲孤燈外紅葉千山瘦馬前
空館荒涼猶有菊詩囊羞澀已無錢
開簾

應悔歸來晚，先得秋風伴。惠連

秋日晚步次胡宿二茂才韻

林色秋煙晚，更蒼短藜扶我力。猶強天從歸鳥沒，邊碧葉
向游人到處黃。驀地商飈吹面急，誰家羌笛倚樓長。臨臯
步屨月初上，驚起雙鳧出野塘。

喜晤石城顏處士徵子卽用顏望湖原韻卻贈

世事都如負壑舟，愛羣常是狎羣鷗。坐無宏景三層閣，卧
有元龍百尺樓。氣奪駑駘徒戀棧，影迴孤鶴欲橫秋。佇看
落葉西風起，一夜鄉心滿石頭。

書大盃山房詩卷後

青女擎霜細作花，一聲鶴唳散明霞。海風吹上三山月，雲
液煙芝夜煮茶。

詩中邱壑夢中緣回首登臨已六年昔日酒痕今日夢三生石上有嗁鵲

寄雲溪參贊

產得龍媒別渥洼每看芳草恨天涯逡巡忽憶嫖姚語未破匈奴莫問家

雙節詩

王吉臣名天佑直隸大名入康熙戊子武孝

廉善岐黃術手狀其母兩夫人始末索詩技

曹白宰總城出說寇寇加以白刃給之日既出分

死殺我何恨但恐望風者懼而不敢降且益堅壁

耳孰與縱我為內應乎遂釋歸已而救至獲全先

是其妻李聞夫出度無還理乃投廢圃井中而井

是邑父歿於亂軍女誓死此井二人既相得為姊
妹願同生死此功曹歸並出之為朱擇配不可請
為側室即吉臣生母也後相夫教子克勤
克儉居同室食同器數十年如一日云

王生名駒日千里長揖公卿皆倒屣兩母芳型世所無無

用張憑親作誅府君曩署涇功曹流寇圍城虎怒號功曹
奮身思卻賊幾陷白刃遭烹炮給賊歸來益堅壁眞見睢
陽探鳥巢射書安事聊城箭全城意氣常囂囂王生二母
朱與李一井相逢誓生死金石同心甘下人嗚呼忠節成
連理不知誰與撰豐碑空使冰心天地垂七十餘年今逝
水寒泉凜冽繫人思自古鬚眉愧巾幗人間鼎足此男兒

杜姬詩

杜姬者甯夏協領明素妾也初素以事籍其家請甯夏姬祖於郊抵暮令返姬曰君雖與

妾訣妾將何之遂結束徒步扶持請謫所有仇家欲謀殺泰姬廉得揚言以懼之仇不敢發姬於是編茅以蔽風雨晝當鑪夜執鍼紉以給旦暮凡八年未嘗頃刻離泰遂得赦免歸先是姬懼禍烈無生理陰具衣數襲金數十兩爲棺斂計至是著衣市馬聯轡而歸朔方之賢豪長者多其貞而能智賦歌詩美其事因爲作杜姬詩

浮萍託江漢聚散無常期女蘿附松柏榮悴永相依邂逅

得從君情好無轉移君情若綺羅新故同一絲妾心如白石成灰猶不溜少小勤執作頗解縫裳衣有無共黽勉賤妾職當爲一朝罹禍患長驅赴西陲蔽身無完服空囊無剩貲兒女走相送但牽君衣啼丈夫自有淚肯向別離垂顧妾一揮手去去從此辭譬彼秋葉落安能戀故枝君如孤飛雲妾作濁水泥甯作濁水泥與君共馳驅鴛鴦不獨宿鴻雁常雙棲徒步雖踣躄願逐君馬蹄生與君綳繆死當相追隨遙遙古朔方人事日已非仇多親故寡願問良所稀面垢項長枷風沙眼猶迷旦暮蔽雨雪爲君結茅茨篝鎧弄鉞箭爲君療寒飢當鑪古所有滌器潔尊罍坐卧同形影須臾不相離一生有九死倉卒防已遲錯鉢妾所積忍令君先知君歿妾當從慷慨心不疑八年一彈指得

赦生同歸衣馬龕具足道路芳菲非向非親比玳安能有
今時至今朔方民南望興長思

文昭字子晉號薌嬰居士又號紫幢軒主人北柴山人

饒餘敏親王阿巴泰四世孫有紫幢軒詩集

王樓村曰紫幢以鮑謝為胚胎而又兼綜鼠有擷諸
家之精華其味在酸醜之外鮑西岡曰紫幢王孫
錄天潢詩為宸蓐集撰於聖廟庚寅歲第一卷恭
載吟世廟天章藩邸之作嘗手錄其目并序傳藏之

龍吟鳳唱皆太平和吉
之音真足籠蓋一代也

詩話薌嬰居士系出太祖少時及漁洋山人之門
辭為讀書嘗侍從祖蘭主人所賞手錄古詩及陳思

閣近書味小樓深深為古詩管右丞太白工部左司
靖節拾遺曲江四家為古詩管右丞太白工部左司

司勳五家為三唐詩管東坡山谷放翁遺山道園青
田青邱漁洋八家為五朝詩管上下數千年僅取此

十數家足以標其宗尚兩錄宗人詩為宸蓐集題七
絕五章於後云青蓮昌谷兩仙入解愛東坡有德麟

不是天潢風雅盛由來四始詠振和氣蒸濡數百
秋萬條柯葉布中州隱囊塵尾承平後莫笑朱門盡

粉侯蕙蔥佳氣五陵原綠闕詩人格調存留得錦囊
寒瘦句開元幾葉辨王孫半世功名託彩毫百年文
獻敢辭勞中州集後南州集也著新編奪錦袍紅蘭
已死問翁徂此事渠誰更覓途萬馬奔馳榮利熱有
人重下冷工夫集凡三十卷古紙集松風塵餘集
吟東屯集在告集交春集古紙續集龍鍾集飛騰集
知田集雍正集松風支集檜棲草畫屏齋橐槐次吟
艾集臺溪集石孟集盤山記游草瓢居草病榻吟爲
子日二十一入旗通志收薊嬰居士集入
卷列古紙續集以下子目僅五蓋非足本

葦溝村

早發葦溝村膏車出郵傳倦睫帶殘睡春風醒酒面板橋
響馬蹶拍拍起鳧雁圓沙平似鏡幽草細如線此古長城
窟有遼作涼殿川原罨眼布界限犬牙穿人坐安車中行
店默數徧宿糧不再春已閱五州縣

盤泉

四山亂山堆泉聲石底響問訊盤泉名飯後一來訪崖高

窄徑紆到此忽開敞鯨甲走滑流魚鱗蕩滉漾巖僧遲我
久箕踞橫藤杖煮茗手支鑪拾薪披榛莽展袖拂樹陰對
坐平岡上遙指青溝雲明朝約同往

晨霽園中作

晨霽天無雲颯樹涼風至草木明朝曦青桐影在地小院
闕無人苔徑紫錢翠幽人午夢醒自喜無塵事焚香對黃
老薤草命童穉且復舉一卮悠悠徑酣醉

露坐

露坐夜方淺天外歸雲薄新月掛西南移時向城落涼風
入井闌桐陰起烏鵲燈火上樓臺流螢度珠箔微涼靜宵
分懷抱良不惡吟詩欲忘眠天街傳夜柝

避雨宿宏善寺

薄暮出郭門迢迢川路永西崦日將沈前村煙欲暝敲葉
雨聲繁號林風勢猛電影劃高原遙認招提境取徑到禪
關隔離出鐙影蛩語古廊深苔侵石竈冷道人止我宿剖
瓜代煎茗塵世萬蠅蚋卧此虛堂靜一枕夢魂清晨鐘催
客醒

春雨歌

夜雨瀟瀟隔窗紙久不聽之聽甚喜耳根心境頓爲清柳
眠花胎初受洗疏鐘幾點禁城邊新雁一聲雲樹裏遙思
南畝田膏虛野老扶犁東作始

焦山古鼎歌

海門風動香煙細古殿光歆神鬼睨玉斲寶匣想同陳紀
嬴秦匝定分類劉侯山骨終菌蠢吳女金位祇侈媚摩挲

不敢近褻玩邾鄆儼觀成周治鏡如對面鑑毛髮動植驚
潛七行字千年獨葆形神全水哭山鳴囚異屢何時流落
江之許亞字欄干雜珠翠有明權相分宜嚴不與秦家別
臯驚議禮何曾準漢唐但綴青詞固高位苞苴四海踰天
家香冠竟致忠良棄忽傳寶氣燭京口逮繫須臾等兒戲
老奴固應寶康瓠大哉奚取宗廟器金繩鐵鎖喧周道席
裹羶包擁津吏忠弼堂前沈水焚有耳恥聞鄢趙議從來
神物戒饗餐培塿一敗成轉易破鏡飛天杳莫期明珠還
浦堪嗟異感傷離合竟何常移植靈巖享高士清晝細繡
梵唱開深堂爛駁魑蹤避洞荒三詔怪鷹巢鬱鬱誰噉舉
前墮闕世昆明幾劫灰乾坤蟻戰會何啻嗟予裹足未能
游屈首紅蟬甘槁悴江天安得眼雙明急呼袍笏軒昂拜

彭城躍水不可見，
叢爾那許同軒輊。
程君好古繼前邈，
辨析鳥蟲漏天意。
書窗三復王維篇，
瓦鼎茶煙颺詩思。

曉行羊房道中

瘦馬馱殘夢，
驚看去路長。
遠煙低似水，
小雪淡於霜。
鴉陣連平陸，
雞聲隔短牆。
林端明霽色，
不覺過羊房。

重陽後三日登水南莊縱目樓

扶醉登樓怯，
臨風醒困眠。
菊殘重九後，
雁沒夕陽邊。
淡月如佳士，
青山改少年。
橫裁羅底絹，
平遠寫遙天。

冬夜散步

小院淒清夜，
新霜壓凍煙。
風鳴黃葉樹，
月漏白雲天。
竹裏鶴時唳，
窗中人未眠。
步檐閒倚杖，
吟罷意茫然。

由畏吾村入磨石口值雨

更入村深處疏林十里蟬前山新過雨隔樹遠聞泉吾意
思編屋平生懶問田是有佳客應爲訪斜川

時序倏已變秋嵐壓接籬荒烟迷舊壘古木暗叢祠搖落
中年興漁樵出世思郵亭渺何許樹杪見青旗

送潘師歸女青道院

好雨宵來足君歸事耦耕到門春水漫壓屋杏花明短草
扶輕策長衫受晚晴清明催上冢吾亦欲山行

聞蛩

秋來已十日殘暑未全平忽聽蟲聲動能令涼思生緒風
時入樹北斗漸沈城欹枕尙無寐孤鐙欲二更

晚晴氣爽鐙火可親偶繙近詩甲乙編次因成一律
得歸茅屋遠塵寰造物多情不吝閒驚酒斷無門剝啄親

人時有鳥間關樹頭華月黃於橘天外頽雲墨似山戲罷
五禽還繼火數篇束筍手重刪

花朝後二日小雨一陣薄有寒色

輕寒猶似早春時獨擁黃紬起較遲燕子來尋當日壘桃
花開到過牆枝一畦嫩雨栽花鋪半硯閒雲中酒詩兀坐
不知門外事脩脩惟覺據梧宜

八月十五日田間請客

社日中秋併一晨小陳蔬果會比鄰盡情酒罷天將暮扶
醉人歸月滿身秔稻香中風漸勁雁鴻聲裏夜初均長安
歌吹誠如海未必清歡若此真

村居書事有懷城中諸友

得歸茅屋賦閒居卻掃依然靜者初浮白心情批酒券殺

青事業勘農書連筒引水看澆菜步履緣隄課牧豬除是鄰翁來問字並無人跡到門闔

寒夜擁爐效范陸體時小屋料理初畢

坐擁重衾覆暝爐一龕如橘蟄潛夫青氈小疊紅藤几素壁高張碧海圖盤篆煙中燒柏子煮茶聲裏睡狸奴新詩改罷還思酒祭督家僮犯夜沽

初夏西山道中絕句

雨後青山淡欲無晴光處處滿平蕪一枝短策前生伴可
是當年范石湖

柳絲蘸雨金千縷山際浮嵐碧一痕日晚牧兒驅犢過炊
煙浮出老人村

小橋雁齒隔林紅夾水人家宛宛通最是清和好天氣一

村新綠酒旗風

藥闌東畔菜畦西
緩轡垂鞭信馬蹏
粉蝶一雙花裏出
飛故著帽檐低

花藏竹掩小柴門
半架朱藤覆短垣
聖代極知非避世
偶逢雞犬似桃源

晚煙散髮出林間
一歲曾能幾度還
十里吟鞭歸未晚
夕陽影裏過琅山

沿村新柳碧毵毵
一抹遙紅夕照酣
水柵山田排比處
畫圖分得小江南

晚晴雜詩匯卷九終

晚晴移詩匯卷十目錄

福喜 二首

福靜 一首

伊都禮 二首

鄂洛順 一首

弘駿 一首

弘昂 一首

永珥 一首

永年 一首

書誠 二十四首

永忠 七首

敦敏 六首

敦誠 十一首

遐齡 二首

晚晴謩詩匯卷十

徐世昌

福喜字損亭輔國公常舒孫襲奉恩將軍有學圃堂集
病起

小疾纔三日幽情減二分對花疏把酒倚檻懶看雲暑氣
先秋逼喧聲近市間更兼吟太苦瘦不讓休文

野別

隱隱行旌野樹間魚軒久駐望前山天空絕塞雲孤往日
下高原鳥自還縱擬離魂酬鉤盒難持破鏡覓刀環相憐
應有南飛雁錦字偷銜入漢關

福靜字樂山克勤郡王岳託五世孫襲奉國將軍

次清爽齋韻

玉律調朱火芳園結翠陰
徑幽無暑到竹靜有風吟
清朗數間屋虛明一片心
高情與地稱琴鶴作知音

伊都禮字立齋奉國將軍賽爾赫子有鶴鳴集

春日喜晤汪武曹前輩

豔陽多佳日淑景流輕颺
閉戶良所欣讀書聊自怡
高軒時到門趨走迎階暉
華髮耀雙眸炯炯揚高眉
神鸞噉清音轉盼雲霄時
况窮靈臺奧能盡天人奇
我欲從君游負笈相追隨
餘光破昏途攀此瓊樹枝

秋夜有憶

微月下庭樹幽房寐獨遲
不知何處笛來觸舊相思
銀漢浮槎日江皋解佩時
無聊在良夜還恐夢佳期

鄂洛順字厚菴奉國將軍賽爾赫子襲奉恩將軍

故人芳履安子昆季同時入泮詩以勵之

世澤從來瑞應殊文光今見耀雙珠影聯泮水輝相映香
發芝蘭韻不孤簇簇喜看盈彩仗煌煌爭見靄庭衢定知
秋榜兼春榜鵬鷺仙班總並驅

弘峻字華川號冷吟居士固山貝子品級允祓子有冷
吟集

移牀竹下清風襲人喜而有賦

炎歊避何處萬竿涼可沐移榻就此君相與媚幽獨媚媚
淨綠陰瑟瑟戛蒼玉爽氣何泠然素襟亦靜穆夢期子猷
來枕邊風簌簌

弘昂字據菴慎靖郡王允禧子早卒

夏日集西園分賦得宜字

日上林園客到時輕風薄曉正相宜一簾野翠山光動半榻清陰竹影移酒瀉荷筒行把盞書成蕉葉坐題詩諸公饒有西園興翰墨幽香拂硯池

永玘字敬存號石樓居士輔國公弘眺子官護軍參領有鑑山堂詩鈔

環翠山房

攤書爲杜清談漸種竹無闕玉筍齊山雪昨朝纔斂白春光已綠易州西

永年字羨門一字純齋號飲魚輔國恪儔公弘瞻子

冬夜懷二兄西征

宿火簾籠釀冷天繭幃布被怯孤眠如何怕首弓刀客夜渡冰霜敕勒川

書誠字實之一字季和又字子玉號樗仙鄭獻親王濟

爾哈朗六世孫襲封奉國將軍有靜虛堂集

詩話樗仙性慷慨不欲嬰世網年四十託疾去官
有隙地盡蒔蔬菓手耒鋤從事晚講養生術食稍茹
甘味必畦而出之詩以疏放勝近體如放鶴終當謀
一艇聽鶯聊且據雙柑懸籬老瓠堪盛酒敵岸殘荷
欲得詩松澗滿鴈風初灑柳絮一庭春欲歸寒生
石氣千巖溼日轉峯陰半壁昏皆劍南佳句也

答和臞仙

病愧陶隱居投簪髮亦綠只有覓粟兒門業愁難續正似
厲人媼生子遽以燭但勿墜先業那復計榮辱惟恐頑若
余碌碌空食粟山林懶慢人家法無檢束癡兒手一經貌
合神不屬養德應蒙求明箴先寡欲過憂天將墜多事蛇
添足願君惠直言庶不失刻鵠

自翠微山口至第一橋

羸馬齧平岡欲試濟勝具奚奴荷拄杖負手就熟路經秋
無飄風丹黃滿巖樹迤邐緣澗濱矚目盡良遇谷口忽若
吞噬嗑飽煙霧西折磴漸危山勢益奔鶩小坐拂蘚石佳
境在指顧

題臞仙泥金畫石便面爲嵩山作

米顛愛石世盡知臞仙畫石實過之爲我曾作雙石圖墨
光壓扇千鈞攜嵩山扇頭畫更好銀染金斂氣逾老野林
野草含秀潤芬芳鎮與煙霞保年來卧病神志昏雙眸冷
醒莓苔痕連陰獨坐戶牖暗無乃久雨雲生根契濶將荒
蔣詡徑卻喜求羊新有贈况是相思索我言我言拙硬殊
難稱二君與我交最深笑言往往相規箴但願此交同此
石人間無處重黃金

食筍行戲贈臞仙

可使身無肉不可食無竹將軍嗜筍體瘦健昌歎羊棗皆
麤俗潞河秋泊渭川賈筐篚腥傾籜龍脯乍看鱗甲形模
糊尙覺彭亨鬱餘怒將軍曉起飢腸鳴蜿蜒入口風雷轟
鍊珍百品不足數一味清淨廉泉僧聞道此僧善說法不
棒不喝不梵夾化身現在我窗前我亦從之敬而狎一陽
初復萌始孳彈指蛩鳴鏞可施擬誇新脆連根贈卻恐狐
搯反被嗤知子多生飽蠹簡啖蔗佳境應非遠

龍王堂雙松歌

雙松夭矯憑潭起定是盧師二龍子盧師死後無所歸覓
父還窟帶泥水盡吸東潭涸欲焦并注此潭流不止此潭
之龍向來懶吝雨慳雲靈未顯一泓玦玦不出山安有餘

滋及田畝雙松久已承家風遂使都人識者罕我亦年來
萬事慵登山疲茶逢雙松掀髯大笑投詩去謾謾西莊在
下風

獵石歌

永定河水湍以渾涸灘羣石猶南奔禽驚獸駭各異狀爛
斑五色明朝暎昔年射獵好身手興疾技癢蒐雲根僮奴
六七翼我進步驟靡不逢其原熊渠精誠可飲羽修羊苗
裔皆觸藩零陵元鳥匡廬雁清遠獅子三蓬豚盡從地出
入我網沙泥膠固絕騰騫卽鹿無虞自多獲足拳翼戢伏
且蹲左右謹譁逞擊搏晉之馮婦齊孟賁五丁神力引蛇
尾古冶善沒磔猶竈磊磊走送不少息四三朝暮隨狙猿
笑受羸醜自隗始誇詫疆礫爲瑱璠膩質詭態漸相繼翳

煙灑眼看瑤琨小。貍大兕不足數。支機貯袖懷河源。嘗聞
董京千日飽。宏成五鹿還。相吞吾非其人。食不得。況膈不
熟。過熊躡徒染十指。盡皸裂嗜酷。無乃增心。慙贊皇子孫。
那長保奇章甲乙。無餘存。尋思往事。患得失。拂衣揮石。旋
定轅荒山日暮。路幽杳。恍然夢境。逢冰痕。非龍非虺。石丈
人卓立。千尺疑元神。狂呼再拜。攜子手。月中同載歸。嶙峋

嵩山以二扇索寫梅各題一首

驕陽炙地氣。騰火百計娛。心無一可爲。君畫扇。固樂爲解
衣。盤礴屢不果。日轉低簷。晝似年風戰。破窗塵似簸。暫借
君扇揮蒼蠅。引滿一杯更。斝鞞清夢非。因復非。想冰界香
天失。故我萬樹梅花照。骨寒病葉狂。花幻霜朵急。醒覓扇
扇在手。摹取一枝興。亦頗寄到神清酒。甕邊知君志在孤

山左

世間萬事無如酒醉眼看花花盡醜惟有梅花惡獨醒直
使離騷不能取吾兄轟飲日萬錢閉門廿載梅爲友殘星
挂簷月不動急雨打窗風若吼此時吾兄睡方穩長瓶支
背瓢承肘今春梅花不著花索我畫扇親自走衰病撓心
興致疏籬枝亂藥拙堪忸願我原非縱鶴翁知君未是和
羹手

讀嵩山夢游天壽山歌次韻卻寄

豈有健步能飛空奇夢突與山靈通夜入天壽馭猛虎曉
隨入神朝紫宮身居富貴玩朝菌神游巖壑餐菘蓉菘蓉華而
不實喻夢想當朝回脫劍佩閣閣倚枕開鴻濛須臾千峯
非真也度腳底蹴踏泉石排雲松畫屏局促鄙宗炳移山委瑣噉

愚公不辨山來與人往細測此理難詳窮煙霞鑄顏氣鑄骨一遨一戲含冲融黃帝得此游華胥至今物穆餘淳風君子在朝小人野何處覓得商山翁誰識將軍作計工暗措五岳實枵胸我今腳疾辭爵封向禽舍我其誰同君當趨朝我贈行努力勲業期銘鐘

題幻翁墨蘭

北人愛蘭不易致畫蘭直作真蘭視吾叔立意恐雷同一以紛糅蘊精粹天地古人皆非師神全故坐形支離快筆如錐劃紙碎破花斷葉含清颺闕闕時聞豹囊鼓輕颺茶煙供香祖世間沈麝敢同焚筆墨聞薰長不腐虛室題詩得數觀似同君子人盤桓薄劣雖慙謝車騎願將心事託芝蘭

爲嵩山題力閻畫扇

近山間遠山力若奔羣馬千里青未了直來壓漁舍舍中
老翁我不如但釣溪魚不讀書寬罾大罾付兒子止留舟
艤游江湖江湖茫茫周四圍日暮獨尋煙樹歸妻炊黍熟
兒易酒喜兒魚勝翁魚肥翁心樂矣不知老非惟過醉亦
過飽長安冠蓋日紛紛未若先生此畫好

題損翁壁間幻翁蘭竹

大石橫卧如睡羊小石側立如驚麕數筆都梁倚蒼筤遂
覺肅肅風盈堂老人宴坐背負牆寄情巖谷恣徜徉虎豹
遠跡蛟龍藏神恬氣和邀百祥我來讀畫喜欲狂色馨香
味諸竅張卽事願翁壽一觴醉後同尋幻有莊生平不佩
紫羅囊芝蘭玉樹非所望但乞煙梢萬丈長著我與翁飲

其傍歡呼大笑樂未央

早梅

不假陽和力孤生造物先
九天猶渾沌一樹已嬋娟
節候每相左冰霜竟失權
只因高欲絕無意競新年

新正獨酌

儲歲無餘酒空樽迫典衣
春寒迎雪作人事過年稀
日月忽今昨行藏偶是非
濁醪有妙理隨意一觴揮

灌讀草堂夏夜

竹院初過雨無風氣自涼
蟲聲疑在野月色忽周堂
境靜由神會心閒與物忘
數杯微醉後清露灑衣裳

嶺西秋日

嶺西山莊無是非礫石墜
塢人煙稀牧牛童子鬪草戲
賣

炭老翁買米歸到戶寒蛩啾唧語穿籬瘦蝶支撐飛開門
圍圍經霜喜抱甕未遂先息機

浮香亭納涼

六月郊坵草樹豐小園新霽暑全空水亭初散芰荷雨冰
簟來乘楊柳風幽鳥不驚人似槁亂蟬忽聒耳如聾自知
未盡忘機事猶向清溪羨釣翁

憇翠微山下酒家

疎柳危崖夾淺流布帘茅店據清幽黃花尙對去年酒白
髮新添此日游近老情懷如短景欲休官况似殘秋頭銜
苦被山翁問將列雲溪作醉侯

未擬雲巖便卜居久將魂夢託樵漁鳴泉任石諧清濁落
葉因風致疾徐人爲病多情益淡山當瘦盡氣偏餘來春

買犢堪終老不遠西莊有敝廬

次韻嵩山田居雜詠

最羨田居近古風自餘耕鑿萬緣空
因君想見桃源境祇在茅簷雞犬中

鄰曲區分自有宜編榆插柳作門籬
怪來老穉紛紛出道是前村祈社時

溪雲淡淡合還披不定陰晴禁火時
約得鄰翁耘宿麥杏花小雨又成絲

嵐鳴雲莊鬧亦幽家家水碓競溪流
田間午饅人皆歇一片平蕪數點牛

桑間鳩語堪初黃滿榻南風午夢長
終老不行城市路一隅雲水自成鄉

永忠字良輔一字渠仙又字臞仙恂勤郡王允禔孫封

輔國將軍有延芳室集

詩話臞仙將軍系出聖祖詩體秀逸書法遒勁常

不衫不履散步市廛見異書必購之歸雖節衣縮食

植也
山晚

暝色自上下高居始見之極目但蒼莽不辨城與陴璧月
東南來漸有清華滋選石坐試茗近傍龍泉池此時妄想
盡惟吟五字詩

山居晚興

模糊米南宮空濛蘇玉局雲嵐變態新煙雨畫意足來作
山中人乃識山隱曲茫茫青靄間鬚眉向人綠
襍被宿翠微全身入畫裏或有山下人貌我圖成紙嵐迷

一鏡炯泉暗亂石齒林巒交岔入醉飽正倚几慚愧東坡
翁備受萬物理

不知今夜雲定作何時雨龍形奮攫拏虎勢橫吞吐咫尺
青靄迷駭童失步武不因短檠然那復識賓主

重九後一日樗仙召集靜虛堂同嵩山賦

九月十日風物清登高已罷心未平陶公籬菊正爛漫折
簡招我借酒兵入門就坐不及語但見椎碎黃泥罌須臾
二客各盡醉瀾翻舌楛公無聽或爲炙輠或雕龍水可使
立山可行狂言那可遽如許酒力張翁神遺形墨妙詩清
公不朽我輩碌碌牛馬走無憂有味老聃言多聞見訶調
御口達觀在昔南華莊夢化蛺蝶恣翱翔吾儕醉耶抑非
夢或有真宰酣黃梁霜風瑟瑟搖窗竹主人送客鐙影綠

但愁醉尉問將軍月好天街不須燭

早發段家嶺

秣馬遲明發東山朱鳥翔煙平春樹闊風細早雲涼雞犬
鳴村遠牛羊牧隴荒田盤看去近今夕宿漁陽

贈無方和尚

老大甘遺世移居雲壑深亂峯圍古寺仄徑出喬林定夜
清猿嘯凌晨野鶴臨門前有流水足鑒道人心

敦敏字子明號懋齋任宗學總管有懋齋詩鈔

詩話懋齋敬亭爲月山從兄子英親王阿濟格五世孫也乾嘉之際宗人能詩者禱仙嵩山隱仙三家鼎立迭相酬唱懋齋兄弟稍後起取徑晚唐頗具逸趣月山有贈懋齋詩云龍頭預卜魁多土桃實行看賦有贊自注明歲將入宗室會試時尚未娶嘉慶前宗人應舉徑赴會試仁宗以爲過優始定鄉會試之制自嘉慶辛酉科始

小雨天橋廠有懷二弟敬亭時住喜峯口

海風水氣腥山翠迫衣冷潮蒸鬱勃雲霧隔朦朧影溝塍
滑泥瀟馬蹶不得騁遙想塞上行雲亂松亭嶺

病中

靜裏悟沈浮門橫一榻幽西風窗外雁黃葉病中秋雨憶
寒宵夢鐘來薄暮愁不眠看夜月又已下簾鉤

西郊同人游眺兼有所弔

秋色招人上古墩西風瑟瑟做平原遙山千疊白雲徑清
磬一聲黃葉村野水魚航閒弄笛竹籬茅肆坐開樽小園
忍淚重回首斜日荒煙冷墓門

贈曹雪芹

碧水青山曲徑遐薜蘿門巷足煙霞尋詩人去留僧壁賣

畫錢來付酒家燕市狂歌悲遇合秦淮殘夢憶繁華新愁
舊恨知多少都付醅醕醉眼斜

曉起望雨

片雲作段飛宿露沈花圃微風雨未來一鳥過前浦

舟中卽目

竹籬茅舍掩清谿幾處人家傍柳隄鷗鳥數聲秋又晚蓼
花紅過小橋西

敦誠字敬亭有四松堂文集

詩話敬亭家有園林四松草堂夢陶軒拙鶴亭五笏
庵皆其游憩地也性嗜酒別構小舍效村肆酒壚懸
帘戶外署曰葛巾居恆與客共飲其中有挽孫灝虛
川詩云鹿洞親依徵國席龍門曾御李君車虛川嘗
董宗學故敬亭出其門又有挽曹霑雪芹詩云牛鬼
遺文悲李賀鹿車荷鍤葬劉伶雪芹爲詩喜作奇崛
語故

云

胡陽洞

曉出城北門遙上白雲麓健屐攀葛藤絕頂窮遠目隔澗
響鳴泉棲鶻叫古木石徑拾松花坐煮山泉熟下山覓蹇
驢夕陽滿空谷

秋雨

昨夜紙窗聲秋霖侵老屋曉起尙溟濛青煙暗庭竹悠然
步松邱危峯滑如沐寒蟬棲濯枝飢鳥下林木采采泐明
花入手秋一掬閒久客稀來小徑莓苔綠

月上村外獨步

秋月上孤村清光照村渚渚水碧而深昨夜添新雨微風
亦修修零露復涓涓黃雲壓稻場紫花香豆圃籬下獨徘徊
竟夕無人語

佩刀質酒歌

我聞賀鑑湖不惜金龜擲酒壚又聞阮遙集直卸金貂作
鯨吸嗟余本非二子狂腰間更無黃金璫秋氣釀寒風雨
惡滿園榆柳飛蒼黃主人未出童子睡罽乾瓊澀何可當
相逢況是溘于輩一石差可溫枯腸身外長物亦何有鸞
刀昨夜磨秋霜且酌滿眼作輒飽誰暇齊鬲分低昂元忠
兩禱何妨質孫濟緼袍須先償我今此刀空作佩豈是日
虔遺王祥欲耕不值買犍犢殺賊何能臨邊疆求若一斗
復一斗令此肝肺生角芒曹子大笑稱快哉擊石作歌聲
琅琅知君詩膽昔如鐵堪與刀穎交寒光我有古劍尙在
匣一條秋水蒼波涼君才抑塞倘欲拔不妨斫地歌王郎
立秋前一日大風雨自朝抵暮不止石塘水溢屋瓦

苔生瀉拂長松蠟翻蕉葉臺上對之眉宇生快遂
命酒與家人飲作長歌下之

黑風吹海天地青四野八荒雲晝暝灑作人間三日雨蕭
颼似帶魚龍腥神鞭鬼馭走萬騎居高建屋傾千甌長空
如掃下雲腳斜飛橫織皆清冷我知上帝沛澍雨故收怒
電藏威霆青鬢未許滴村落黑猪那復泅天溟明朝晨霽
蹠松嶂初秋爽動西山陘遙知此際山漲發旬巖響谷無
泓渟安能飛去煙雲窟驚濤獨倚山窗聽臺前景色亦不
惡槎枒竹樹昏簷庭菡萏香深隔略約芭蕉葉大遮窗櫺
石塘水溢魚入戶老屋地上浮新萍山妻不嗔水漂麥癡
兒未至頭觸屏急掃苔茵坐橫石旋開家宴傾酒醺小鬢
行酒老婢壽豈有玲瓏歌且停醉來便枕松根卧松風高

落吹人醒

凍蝶行

彤雲壓簷霜如水斷檻空階百蟲死朔風吹蝶何處來猶
向東籬覓寒藥香鬢金翅半消磨欲飛無力可奈何小鬢
戲撲置奩內脂蘭爲茵粉作窠記得春時紅紫綻日繞秦
樓過漢殿東風幾日如芳叢不信韶華去如電滕王下筆
費躊躇瘦形朝來難再摹南華夢斷隔煙水庭空月暗秋
魂孤蝶兮蝶兮暫棲止尙有梅花堪徙倚明年放爾曲欄
中春露團香生鳳子

同諸兄弟飲月下聽濤聲

入夜濤聲急如聞百丈湫村樓歸酒客浦月聚漁舟露氣
涼於雨詩襟淡似秋行歌借雁侶來此狎羣鷗

潞河舟中遇書筠園李仲青郭澄泉纜不能維一語

別去因寄是詩並感懷貽謀弟

弟墓近南岸

夕照臺前煙樹合契丹城下水雲開卻逢李郭同舟渡可
遇山王隔竹回十里平舉明晚鏡兩隄青靄入殘杯筆牀
茶竈依然在不見天隨放鴨來

山月對酒有懷子明

竹谷西邊澗水東一筇隨意到花宮四更寒吐秋山月萬
壑濤生落葉風遙嶺鐘沈孤塔外殘鐙人語夜厨中定知
清夢迷煙樹湖上南園聽雁鴻

南村雨中

古栢荒祠叫暮鴉春雲淡墨歷平沙一天寒食瀟瀟雨人
在南村賣酒家

肥田老青田名一
三
饑婦家家動晚炊，低煙不起繞荆籬。
老農貪著春耕雨，溼盡黃牛下隴遲。

遐齡字菊潭，鄭恭親王積給納曾孫襲封奉恩將軍，有嶺雲齋詩草。

夏日閒居

雲薄不成雨，遠天開晚晴。
古苔依壁活，幽草閉門生。
飲酒得真趣，讀書無俗情。
閒居儼林壑，倚樹聽蟬聲。

龍泉庵夜題

游興吟情兩不違，煙霞無礙足因依。
崖懸瀑水鳴幽籟，雲裏鐘聲出翠微。
夜靜忽驚村犬吠，燈明遙識寺僧歸。
紅塵縱使高千丈，未許青山頂上飛。

晚晴移詩匯卷十終

晚晴移詩匯卷十一目錄

孫奇逢

七首

王夫之

二十六首

顧炎武

四十三首

黃宗羲

三十三首

陸世儀

二十二首

張履祥

十一首

顏元

三首

晚晴移詩匯卷十一

徐世昌

孫奇逢字啟泰號鍾元容城人晚居輝縣夏峯村學者
稱夏峯先生明萬曆庚子舉人入國朝屢徵不起從
祀孔廟有夏峯先生集

魏環極曰先生攜家入易之五公山結茅雙峯嫻黨
門人依以自保者數百家筋武備定條約暇則講詩
習禮修冠昏喪祭儀節節而可行順治初祭酒薛公
所蘊具疏讓官兵部侍郎劉公餘祔及巡按御史薦
刻上先生堅臥不起蘇門爲康節魯齋讀書之地泉
石幽勝遂移家築堂名曰兼山讀易其中子孫耕稼
自給門人負笈來者日眾有請問者隨其淺深傾懷
告之無不置酒相邀兒童皆歡喜

相就曰我先也年九十二卒
詩話夏峯理學大儒不以詩名當明之亡年已六十
有一舊有歲集三十卷詩文在焉皆刪革前作後
今所存詩二卷皆隨事寓懷有閒澹自適之趣

讀許魯齋集

我讀公遺書知公心最苦乾坤值元運民彝已無主公等
二三輩得君爲之輔倫理未全絕此功非小補不陳伐宋
謀天日昭肺腑題墓有遺言公意有所取眾以此誚公未
免儒而腐道行與道尊兩義各千古

書感

我來千餘里思見英雄人胸中羅今古萬物待其新人也
而天遊釣渭與耕莘不然隱君子山水樂相隣邱壑適吾
意皎潔不染塵二者俱悠逸斯道竟沈淪乃知古人出堯
舜其君民退處林泉下坐使風俗淳仁可覆天下亦可善
一身此字不分明痛癢總不親庸眾是非混英雄好惡真
此是經綸手千古無等倫

劉佐五設榻兼贈寶刀

東風吹雪滿闌干，曉日清空白晝寒。四十年來燕市裏，樓前流水紅塵起。竿頭青苧酒旗搖，有人匣中鳴寶刀。把手贈之錦作帶，深慙下榻逢交泰。坐間肝膽饒素腸，情興淋漓月照牀。燒燭頓忘別話久，香添再煮瓶中酒。春花未吐春衫紆，山色溪光盡入廬。今夜停杯好相語，平明上馬過東去。應知依依不勝情，橋南細問黃鸝聲。中天斗畔高明月，莫教清笳吹石碣。雲遶薊門老綸巾，路傍羞對看花人。題宋懷豫飲光臺

臺敞元無暑，翛然萬慮捐。月沾衣帶冷，花促酒杯乾。意氣悲歌裏，風雲指顧前。夜深迷去徑，獨爲主人賢。

送友歸白下

驚看鴻雁北歸帶白門秋戀弟耽孤託思親畏遠遊裝輕
惜道路老至愛朋儔來歲黃花發東籬一徑留

長至

日臨長至雪霜深倚榻圍爐酒自斟一代是非誰共語百
年感慨入孤吟閒從竹石同幽夢靜向琴書寄遠心此際
陽生人不覺貞元消息好相尋

偶題

程日多清課操功不厭深看雲消妄相調鶴息機心

王夫之字而農號薑齋衡陽人學者稱船山先生明崇
禎壬午舉人永厯時官行人司行人入國朝隱居不
出從祀孔廟有薑齋詩集

劉繼莊曰王而農先生王申歲已八十矣隱居山中
未嘗入城市其學無所不窺於六經皆有發明洞庭

以南天地元氣聖賢學服僅此一縷耳
鄧湘皋曰先生又號雙髻外史中歲稱一瓢道人南渡後走桂林瞿忠宣薦授行人後以母病間道歸築土室於石船山名曰觀生居敗葉庵湘西草堂晨夕杜門著書滄桑黍離之感生死不忘其志行之起卓學問之正大體用之明備著述之宏富當與顧亭林黃梨洲諸老相頡頏精研六經詩其餘事詞旨深覈氣韻沈鬱讀之如觀夏鼎商彝如聞哀猿唳鶴使人穆然神肅愴然意遠

詩話船山詩以自定藁爲正本餘編亦多傑作而寸心得失所在可以微窺昔人評亭林詩如泰華秋色瑟瑟楚材稱雄斯冠一代矣

冬遇

太華蛻奇骨黃河問靈軀風雨恣所狎金石等不渝堅脆各叛紀正襟守中樞靚閱嬰陸沉隕問戒斯須吾生匪蜚雉物狀漫紫朱聊息朱鳥麓夢無金簡書延彼堪輿情充茲營魄虛晶宇滌宿雲回風蕩椒隅薄嵐開夕暎寒英媚

霜趺佳期無定軫元化隨與俱悅心道已廣栖貞鄰豈孤
三壽同修促二見息肥癩

讀指南集

絳節生須抱壁還降牋誰捧尺封閑滄波淮海東流水風
雨揚州北固山鵲血春啼悲蜀鳥雞鳴夜亂度秦關瓊花
堂上三生路已滴燕臺頸血殷

揚州不死空坑死出使皋亭事未央鳴鳩春催三月雨丹
楓秋忍一林霜欄門鶴唳留朱序文水魚書待武陽滄海
金椎終寂寞汗青猶在淚衣裳

康州謠追哭督府義興相公是去秋同鄒管二中舍
會公地

可憐康州城瀧水從南來龍旗翩翩去何繇蒼梧迷密雲

不開秋風起秋葉飛旗翩翩去不歸烏頭黑雀頭白城上
飛聲啞啞羽林軍神廐馬昨日靈羊溪今日康江下楊花
自飛烏自栖相公白旄清潯西康州城下生蒺藜

擬阮步兵詠懷

白日閱寒雲長夜復陰雨夕螢流溼光因風歎相聚奔獸
不違林驚禽亦懷侶下土情不深目迎心已許悲歌難自
固上蔡餘酸楚失弓原郢客逐日非夸父要領誠不惜孰
爲同草腐

鄴臺闕新宮高陽矜廣宅游冶相紛奔追歡倒屣烏黃雀
在枌榆取之若芥珀華山有高士燒金方結客舒卷無淺
心靈蛻託仙迹

蔓草縈咸陽云是阿房宮雛鳳復雙飛莫辨雌與雄山河

既綢繆宴處時從容挾彈鳴金鉞垂楊騎青驄意氣生豪
族芳塵散春風努力拾新翹無言恤飛蓬秉燭繼白日爲
歡無終窮

浮雲起東南悠然鶩西北駛影無淹留凝望滋迷惑前者
既蕭散後來空閔默豈爲仰觀者佇迹從察識稚鳥空翔
飛馮風鼓羽翼達人知其微馳驅無軌則蘋末生輕風孤
心自相得

支祁降橫流十日恣炎熒英靈相委順千載無秋春刀圭
詎偶爾靈液起沈淪鳳笙非世響十載將上賓自信匪無
功勤立丹臺勳

方壺與圓嶠相去無黍米星河流其間日月盪其裏孤游
忘歲月奇璨爭紛詭調良駕河車六龍就方軌補天西北

傾奠地東南委清虛非久居沈淪安足紀

昭陽菴同須竹夜話云乘木葉秋波探五老之勝因
便送之

儘覺當年不易談披雲躡石意猶貪袖圖有迹傳河畫血
字無心鋼井函白日只今原不損青山向後定誰堪知君
欲訪匡廬瀑摘去蓮花池上參

小樓雨枕

江城二月催寒雨山客三更夢嶺雲青鏡分明知鶴髮寶
刀疇昔揜龍文援毫猶記趨南史誓墓還誰起右軍飛鳥
雲邊隨去住清猿無事憶離羣

長鏡剛尤自生涯短棹衝萍有獨知偶測天心容杖屨不
從人事整鬚眉孤情琴外傳昭氏病眼花前待子規閒坐

山房詩話卷一
五
小樓清澈極垣衣綠潤帶煙垂

小圃桃花發幾株暫時瀟灑且江湖柳風乍得吹烏帽燕
壘莫驚長綠蕪符璽可容徐廣淚山河難授馬融圖千秋
歷歷憑青史不信兵戈有腐儒

客窗倦雨曉朦朧乍有晨光半紙紅江岸夜喧春水長沙
汀波漾燕泥融乾坤卽事容心廣老病隨緣自德充莫問
漁津知處否綠陽繞屋已陰濃

讀涇陽先生虞山書院語錄示唐須竹

涇陽先生不復作涇陽遺編懸高閣彩虹垂天漫璀璨大
造徒爾鼓空橐永陵之季狂瀾驚倒吹枯瓠爲玉笙平地
躍起攫光影失足猶漫誇輕清先生兩足不妄插矗立欲
撐銀漢傾烏舌無從說烏夢人頭定可作人鳴毫髮析作

千萬片一絲獨飛挂匹練亭亭萬歲終不歇世人皆見莫
能見嗚呼乎吾不知麟衰鳳去將誰傳區區下界縈寒煙
秉燭對讀過深夜詰旦赤日生高天

唐如心見過

春草初生雪霰零山山曾踏幾莖青居然天地成今古何
必雲嵐不典型執戟漢亡誰載酒尙書秦暴有傳經憐君
問禮當深夜急難原頭念鵲鴿

春興

嬉春遲暮老廉夫長卧歸休舊酒徒不分傳家三傳在從
來亡國一身孤玉錢月影窺雙鬢碧海雲波認五湖一儘
龍鍾供世笑蒼天還識老狂無

樓空山遠溼煙蒸返景長天暝色仍千里湘臯歸雁雨九

耶斯卷言圖卷一
江春水釣魚鐙馬殷冢在生新草陸遜營荒挂古藤夢裏
白蘋洲上月遙遙北渚接黃陵

寄題先兄祠屋

寒泉古木問何年鶴羽歸來一洒然滄海能消銜土怨沃
州不待買山錢誰投炬救酬江水爲餌餒香禁冷煙留語
烏衣諸子弟應知頭上有青天

白髮青林一徑慳羊裘不揀釣魚灣當年有誓潭龍窟身
後還悲弔烏山目送斜陽沈海岸手栽修竹染霜斑致身
錄在憑誰讀鑪冷香消亦等閒

代書寄衡山戴晉元

松梢淺著餘冬雪蘭若閒燒丙夜鐙一枕夢回衾似水不
知仙洞隔朱陵

始春試筆

一紀秦昌年攀髯憶普天江山方錯繡日月遽浮煙麟獲
星方孛龍災血已玄天情能愛日何有墜虞淵

湘岸畫樓新城烏怨早春白頭聊應識素旄有歸輪龍鳳
非存趙狐魚且破秦英雄酬一死心跡未全湮

方輿誰曩屬蜃閣自風濤欲警羣心夢勿云帝聽高他年
今日始孤棹萬波操小顧春光笑東風氣象豪

緩緩梅花發容容病眼看吾生春不厭他日老無難書帶
藥新草流珠養大丹海鷗慣蕭瑟何礙忍風湍

顧炎武初名絳字甯人崑山人明諸生從祀孔廟有亭

林集

李榕村曰甯人博涉強識好爲蒐討辨論之學十三
經諸史旁及子集稗野列代名人著述微文碎義無

不考究騎驢走天下所至荒山頽阻有碑版遺跡必
 披榛營試班鮮讀之書然後三代之文可讀雅頌之音
 有獨得其所自漢晉以來未之有也潘次耕曰甯人
 各得其所自漢晉以來未之有也潘次耕曰甯人
 先生負其絕世之資潛心古學九經諸史畧能背誦尤
 留心當世世之資潛心古學九經諸史畧能背誦尤
 講求當世世之資潛心古學九經諸史畧能背誦尤
 老然憂天閔人之志未嘗少衰事關國計民命者必
 窮源溯本討論其所以然足跡半天下所至交其賢
 豪長者考其山川風俗疾苦利病如指諸掌精力絕
 人自少至老未嘗一日廢書出必載書數篋自隨旅
 店少休披尋搜討有一疑義反覆參考必歸於至當
 有一獨見援古證今必暢其說而後止天下無賢不
 肖皆知先生為通儒朱竹垞曰甯人詩無長語事
 必精當詞必古雅抒山長老所云清景當中天地秋
 色庶幾似之沈歸愚曰甯人肆力於學窮極根柢
 韻語其餘事然詞必已出風霜之氣松
 柏之質就詩品論亦不肯作第二流人
 詩話亭林博學篤行直大方嚴有清諸學訓詁考訂
 音韻金石輿地各有專家遠勝前代其端皆自亭林
 開之儒生講經世之學亦以亭林為職志而推本程
 朱求合六經之旨以勤學問謹踐履為本正人心厚
 風俗為用空談性理懸為大戒所見尤在同時理學
 諸公之上詩初自七子入進而益上心摹手追惟在

少陵敦厚深微
亦足弁冕一代

義士行

飲此一杯酒浩然思古人自來三晉多義士程嬰公孫杵
臼無其倫下宮之難何倉卒賓客衣冠非舊日袴中孤兒
未可知十五年後當何時有如不幸先朝露此恨悠悠誰
與訴一心立趙事竟成存亡死生非所顧嗚呼趙朔之客
真奇特人主之尊或不能得獨有人兮長歎空山側

懷人

秋風下南國江上來飛鷺江頭估客幾千輩其中別有東
吳船吳兒解作吳中曲扣舷一唱悲歌續乍迴別鶴下重
雲一叫哀猿墜深木曲中山水不分明似是衡山與洞庭
日出長風送舟去祇留江樹青冥冥湘山削立天之角五

嶺盤紆同一握，嶽崑七十有二峯。紫蓋獨不朝，衡嶽萬里
江。天木葉稀，行人相見，客沾衣。寄言此日南征雁，一到春
來早北歸。

金壇縣南五里顧龍山上有高皇帝御題詞一闕

突兀孤亭上碧空，高皇於此下江東。卽今御筆留題處，想
見神州一望中。黃屋非心天下計，青山如舊帝王宮。丹陽
父老多遺恨，尙與兒童誦大風。

秀州

秀州城下水，日夜生春雲。雲舍秀州塔，鳥下吳江濱。我願
乘此鳥，一見滄海君。異人不可遇，力士難再得。海內不乏
賢，何以酬六國。將從馬伏波，田牧邊郡北。復念少游言，憑
高一悽惻。

贈路舍人

自分寒灰卽溺餘非君那得更吹噓窮交義重千金許疾
吏情深一上書大麓陽廳回宿草岷江春水下枯魚丁甯
未忍津頭別此去防身計莫疏

桃葉歌

桃葉歌宛轉舊日秦淮水清淺此曲之興自早晚青溪
橋邊日欲斜白土岡下驅虞車越州女子顏如花中官采
取來天家可憐馬上彈琵琶三月桃花四月葉已報北兵
屯六合官車塞上行塞馬江東獵桃葉復桃根殘英委白
門相逢冶城下猶有六朝魂

勞山歌

勞山拔地九千丈崔嵬勢壓齊之東下視大海出日月上

接元氣包鴻濛幽巖秘洞難具狀煙霧合沓來千峯華樓
獨收眾山景一一環立生姿容上有巨峯最削另數載榛
莽無人蹤重厓複嶺行未極澗壑窈窕來相通天高日入
不聞語悄然眾嶺如秋冬奇花名藥絕凡境世人不識疑
天工云是老子曾過此後有濟北黃石公至今號作神人
宅憑高結構留仙宮吾聞東嶽泰山爲最大虞帝柴望秦
皇封其東直走千餘里山形不絕連虛空自此一山奠海
右截然世界稱域中以外島嶼不可計紛紜出沒多魚龍
八神祠宇在其內往往碁置生金銅古言齊國之富臨淄
次卽墨何以滿目皆蒿蓬捕魚山之旁伐木山之中猶見
山樵與村童春日會鼓聲逢逢此山之高過岱宗或者其
讓雲雨功宣氣生物理則同旁薄萬古無終窮何時結屋

依長松嘯歌山椒一老翁

賦得秋柳

昔日金枝間白花只今搖落向天涯
條空不繫長征馬葉少難藏覓宿鴉
老去桓公重出塞罷官陶令乍歸家
先皇玉座靈和殿淚灑西風夕日斜

劉諫議祠

卓囊青史漫傳名白日黃泉氣未平
自古國亡緣宦者可憐身沒尙書生
荒阡草長妖狐出舊驛風寒劣馬行
一自德陵升馭後山河祠廟總淪傾

秋雨

生無一錐土常有四海心
流轉三數年不得歸園林
蹠地每塗淖闕天久曠陰尙翼
異州賢山川恣撻尋秋雨合淮

泗一望無高深眼中隔泰山斧柯未能任車沒斷崖底路
轉崇岡岑客子何所之停驂且長吟夸父念西渴精衛憐
東沈何以解吾懷嗣宗有遺音

與江南諸子別

絕邑飄零苦著書
竭來行李問何如
雲生岱北天多雨水
決淮壩地上魚濁酒
不忘千載上荒雞
猶唱二更餘
諸公莫效王尼歎
隨處容身足草廬

重謁孝陵

舊識中官及老僧
相看多怪往來曾
問君何事三千里
春謁長陵秋孝陵

贈林處士古度

老者人所敬於今乃賤之
臨財但苟得不復知廉
維五官

既不全造請無虛時趙孟語諄諄煩亂不可治期頤悲緒
淵毫齒嗟蘇威以此住人間動輒爲世嗤疑疑林先生自
小工文辭彬彬萬厯中名碩相因依高會白下亭卜築青
溪湄同心游岱宗誼友從湘纍江山忽改色草木皆枯萎
受命松柏獨不改青青姿今年八十一小字書新詩方正
既無訕聰明矧未衰吾聞王者興巡狩名山來百年且就
見况德爲人師唯此耆成人皇天所憇遺以洗多壽辱以
作邦家基

禹陵

大禹巡南守相傳此地崩禮同虞帝陟神契鼎湖升窆石
形模古墟宮世代仍探奇疑是穴考典或言陵玉帛千年
會山河一氣憑御香來敕使主守付髡僧樹暗巖雲積苔

深壑雨蒸鶴鶴呼豕柏蝙蝠下祠鐙餘烈猶於越分封竝
杞鄆國詒明德胙人有霸圖稱往者三光墜江干一障乘
投戈降北固授子守西興冲主常虛己謀臣動自矜普天
皆爵祿無地使賢能合戰山回霧窮追海踐冰蠶城迷白
草鏡沼爛紅淩樵採岡林徧弓刀鳴壁增遺文留仆碣仄
徑長荒藤望古頻搔首嗟今更撫膺會稽山色好淒惻獨
攀登

三月十九日有事於攢宮時聞緬國之報

此日空階薦一觴軒臺雲氣久芒芒時來夏后還存祀識
定凡君自未亡宿鳥乍歸陵樹穩春花初放果園香年年
霑灑頻寒食咫尺龍髯近帝旁

五十初度時在昌平

居然溲落念無成，隙駟流萍度此生。
遠路不須愁日暮，老年終自望河清。
常隨黃鶴翔山影，慣聽青驄別塞聲。
舉目陵京猶舊國，可能鐘鼎一揚名。

又酬傅處士次韻

清切頻吹越石笳，窮愁猶駕阮生車。
時當漢臘遺臣祭，義激韓讐舊相家。
陵闕生哀回夕照，河山垂淚發春花。
相將便是天涯侶，不用虛乘犯斗槎。

汾州祭吳炎潘禋章二節士

露下空林百草殘，臨風有慟奠椒蘭。
韭溪血化幽泉碧，蒿里魂歸白日寒。
一代文章亡左馬，千秋仁義在吳潘。
巫招虞殞俱零落，欲訪遺書遠道難。

王官谷

士有負盛名卒以虧大節咎在見事遲不能自引決所以
貴知幾介石稱貞潔唐至昭宗時干戈滿天關賢人雖發
憤無計匡机隄邈矣司空君保身類明哲墜笏雒陽歸
來卧積雪視彼六臣流恥與冠裳列遺像在山厓清風動
巖穴堂茅一畝深壁樹千尋絕不復見斯人有懷徒鬱切

華山

四序乘金氣三峯壓大河巨靈雄鼻鼻白帝儼巍峩地劣
窺天井雲深拜斗阿夕嵐開翠嶺初月上青柯欲摘星辰
墮還虞虎豹訶正冠朝殿闔持杖叱羲和勢扼雙嶠壯功
從駟仗多未歸桃塞馬終負魯陽戈山鬼知秦帝蠻王屬
趙佗出關收楚魏浮水下江沱老尙思三輔愁仍續九歌
唯應王景畧歲晚一來過

將去關中別中尉存杠於慈恩寺塔下

廓落悲王子棲遲愛友朋荒郊紆策馬獵徑傍韝鷹土室
人稀到衡門客少應傾壺頻進酒散帙每挑燈歎昔當憂
患先人獨戰兢薄田遺豆麩童阜剩薪蒸疾病嗟年老虔
恭尙夙興芋魁收蜀郡瓜種送東陵世業爲奴有空名任
盜憎幸餘忠厚福猶見子孫承渭水徂年赤岐山一夜崩
低頭從竈養脫跡溷林僧毒計哀阬趙淫刑虐用卽忠魂
依井植碧血到泉疑困鬣時防罟驚禽早避矰屢捫追駟
舌莫運擊蛇肱謬忝師資敬多將氣誼憑深情占復始積
德望高升子建工詩早河間好學稱堂垣逾舊大國邑與
前增九鼎知猶重三光信有徵沈埋隨劍璽變化待鯢鵬
樹落龍池雪風懸雁塔冰更期他日會拄杖許同登

龍門

互地黃河出開天此一門千秋憑大禹萬里下崑崙入廟
焄蒿接臨流想像存無人書壁問倚馬日將昏

贈孫徵君奇逢

海內人師少中原世運屯微言垂舊學懿德本先民早歲

多良友同時盡諍臣蒼黃悲詔獄慷慨急交親天啟中左光斗魏大

中周順昌三君被逮至京黨錮時方解儒林氣始申明廷

君爲周旋營救不辭禍患

來尺一空谷賁蒲輪未改幽棲志聊存不辱身名高懸白

日道大屈黃巾衛國容尼父燕山住子春門人持笈滿郡

守式廬頻竹柏心彌勁陶鎔化益醇登年幾上壽樂道卽

長貧尙有傳經日非無拜老辰伏生終入漢綺里只辭秦
自愧材能劣深承意誼真惟應從卜築長與講堂鄰

重過代州贈李處士因篤在陳君上年署中

雁門春草碧且復過滹沱爲念離羣友三年愁緒多魯酒
千鍾意不快龜山蔽目齊都隘卻來越國訪廉頗還到關
中尋郭解陳君心事望諸儔吾友高才冠雍州玉軸香浮
鈴閣曉彩毫光照射堂秋人來楚客三閭後賦似梁園枚
馬游句注山邊餘舊壘五原關下臨河水青冢哀笳出漢
宮白登奇計還天子窮愁那得一篇書幸有心期託後車
又逐天風歸大海好憑春水寄雙魚

得伯常中尉書卻寄并示朱烈王太和二門人

岱雲東浮日西暎下有畸人事鉛槧忽來青鳥銜尺書月
入軒櫺燈吐燄別子三年斷音問傲裘白髮空冉冉引領
常晞函谷關停驂尙憶終南厂頻行把酒送余去重來何

日當分陝腐儒衰老豈所望感此深情刻琬琰擔簦百舍不自量可能再上三峯險君家賢甥與令嗣舞雩歸詠同曾點尙論千秋品竝堪以吾一日年猶忝期君且復慰離愁勿向流光悲荏苒

過蘇祿國王墓

豐碑遙見炳奎題尙憶先朝寵日禪世有國人供灑掃每勤詞客駐輪蹄九河冰壯虓狐出十二城荒白鶴棲下馬一爲郊子問中原雲鳥正淒迷

子德李子問余在難特走燕中告急諸友人復馳至

濟南省視於其行也作詩贈之

急難良朋節扶危烈士情平居高獨行此去爲同盟撫劍來燕市揚鞭走易京黃埃隨馬漲黑水繫船橫救宋裳初

裏囚梁獄未成，盈庭多首鼠。中路復怔營，已涉平原里。遄
驅歷下城，雲浮泉氣活。日麗嶽林明，夜樹蟬初引。晨巢鵲
亟鳴喜，猶存卞璞幸。不蹈秦坑勞，苦詞難畢悲。歡事忽并
藁，儻勤問遺寢。息共論評發，憤皆公正姘。修自幼清君賢
關羽弟，我愧季心兄。將伯呼朝士，同人召友生。詩書仍燼
溺，禹稷竟冠纓。頗憶過從數，深嗟歲序更。川巖句注險，池
館薊邱平。每竝登山屐，常隨泛月觥。詩從歌伎采，辯使坐
賓驚。祿位揚雄小，囊錢趙壹輕。與君俱好遯，於世本無爭。
史論悲鉤黨，儒流薄近名。材能尊選愼，仁義怵孤嫠。自得
忘年老，聊存處困貞。不才偏累友，有膽尙談兵。坎窞何當
出，虞機詎可搜。殷勤申別款，落寞寔感精。誠禽海填應，滿盞
山井豈。傾相期非早，暮渭釣與莘。耕

亡友潘節士之弟未遠來受學兼有投詩答之

生平不擬託諸侯
吾道仍須歷九州
落落關河蓬轉後
蕭蕭行李雁飛秋
爲秦百姓皆黔首
待漢儒林已白頭
何意故人來負笈
艱難千里愧從游

十年離別未言還
楚水楓林極望間
野雀暮歸吳季廟
寒濤秋擁伍胥山人琴已逝增哀涕
笠屨相看失壯顏
獨有士龍年最少一朝詞筆動江關

太原寄王高士錫闢

游子一去家十年
愁不見愁如汾水東
不到吳江岸
異地各榮衰
何繇共言宴
忽睹子綱書
欣然一稱善
知交盡四海
豈必無英彥
貴此金石情
出處同一貫
太行冰雪積
沙塞飛蓬轉
何能久不老
坐看人間換
惟有方寸心
不與元

鬢變

讀李處士容襄城紀事有贈

躑躅荒郊酌一樽
白楊青火近黃昏
終天不返收嶠骨
異代仍招復楚魂
湛阪愁雲隨獨雁
潁橋哀水助啼猿
五千國士皆忠鬼
孰似南山孝子門

路光祿書來敘江東
同好諸友一時徂
謝感歎成篇
削跡行吟久不歸
修門舊館露先晞
中年早已傷哀樂
死日方能定是非
彩筆夏枯湘水竹
清風春盡首山薇
斯文萬古將誰屬
共爾衰遲老布衣

刈禾長白山下

載耒來東國
年年一往還
禾垂墟照晚
果落野禽閒
食力終全節
依人尚厚顏
黃巾城下路
獨有鄭公山

靈石縣東北三十五里神林晉介之推祠

古人有至心不在狷與忍國祿既弗加吾身可以隱去矣
適其時耕此荒山畛更與賢母偕邱壑情同允卓哉鸞鳳
姿飄飄高自引嚮使屬戎行豈其遜枝軫出處何必齊此
心期各盡末世多浮談有類激小忿割股固荒唐焚山事
可哂微哉仲子廉立操同蚯蚓遺祠君故鄉父老事惟謹
牡丹異凡花春深洗鉛粉况此黃蘆林晚送秋風緊厲彼
頑鈍徒英名代無隕

關中雜詩

文史生涯拙關河歲月勞幽情便水竹逸韻老蓬蒿獨雁
飛常迅寒雞宿愈高一闕西華頂天下小秋毫
皇漢山樊久興唐洞壑餘空嗟衣劍滅但識水煙疏寥落

三都賦棲遲萬卷書西京多健作儻有似相如

谷口耕畬少金門待詔多時情尊筆札吾道失弦歌夜月
辭雞樹秋風下雀羅尙留園綺跡終古重山阿

徂謝良朋盡彫傷節士空延陵虛寶劍中散絕絲桐名譽
蓀蘭竝文章日月同今宵開敝篋猶是舊華風

緬憶梁鴻隱孤高閱歲華門西吳會郭橋下伯通家異地
情相似前期道每賒請從關尹住不必向流沙

次耕書來言時貴有求觀余所著書者答示

年來行止類浮萍雖有留書未殺青世事粗諳身已老古
音方奏客誰聽兒從死父傳楹語帝遣生徒受壁經投筆
听然成一笑春風綠草滿階庭

冬至寓汾州之陽城里中尉敏浮家祭畢而飲有作

歲時常祭祀朝夕自饗飧尙是先人祚誰非故國恩枯哇
殘宿雪凍樹出初噉奠醞求何所鄰家借小園

流離踰二紀愴怳歷三都墮甌煤還拾承槽酒旋沽荒庭
依老檜空谷遺生芻白髮借宗叟相看道不孤

王孫猶自給一項豆萁田今日還相飯千秋共爾憐青門
餘地窄白社舊交偏傳與兒曹記無忘漢臘年

黃宗羲字太冲號梨洲餘姚人明御史尊素子魯王以
爲左僉都御史國朝康熙戊午舉博學鴻詞庚申薦

修明史均辭從祀孔廟有南雷詩歷

全紹衣曰公以濼洛之統綜會諸家橫渠之禮教康
節之數學東萊之文獻良齋止齋之經制水心之文
章莫不旁推交通自來儒林所未有康熙戊午詔徵
博學鴻儒掌院學士葉公方禱先以詩寄公懇愿就
道公次其韻勉其承莊渠魏氏之絕學而告以不出
之意未幾又有詔以葉公與同院學士徐公元文監

修明史乃與前大理評事興化李公同徵公以母既
耄期已亦老病爲辭是時聖祖純心正學表章儒
術大臣亦多躬行君子左都御史魏公象樞曰吾生
平願見而不得者三人夏峯黎洲二曲也工部尙書
湯公斌曰黃先生論學如大禹導
水導山脈絡分明吾黨之斗杓也
詩話黎洲受業茲山之門於學無所不通詩其餘事
羅萬藻序中所稱鐵琴死戰馬老狐行諸篇今詩歷
皆無之蓋少作刪落不少矣其自序有云多讀書則
詩不期工而自工若學詩以求其工則必不可得卽
其詩可知已

蚤發東明禪院同芝兒

鐘聲破山靄繩牀卷餘夢霧交猿路迴泉亂魚心縱斷虹
方鬪日春禽有剩弄灰暖梯水田樹廣貧居棟世亂纔息
心何免泉石諷

三月十九日聞杜鵑

江村漠漠竹枝雨杜鵑上下聲音苦此鳥年年向寒食何

獨今問摧肺腑昔人云是古帝魂再拜不敢忘舊主前年
三月十九日山岳崩頽哀下土雜花生樹鶯又飛逆首依
然逋膏斧燕山模糊吹蒿蕪江表熙怡臥鐘鼓太王蓄意
及聖昌與窳通誠各追數金馬封事石渠書怨毒猶然在
門戶靜聽嗚咽若有謂懦夫不難安寢藪何不疾呼自廟
堂徒令涕泣沾草莽

金陵哭外舅葉六桐先生

泥塗身事苦行止自難持春雨迷台路秋聲滯燕磯音塵
三月斷傳說數番疑夙昔風期在青鐙或見之
人傳星隕日正是月虧時流水秦淮咽黃花籬落衰編文
後死責稅服禮經疑淚入三泉下寒風莫浪吹

寒夜月做孟東野體

霜輝濯寒魄景象恆過清止于枕上看不可立中庭枕上
一尺光中庭千里橫千里多傷悲一尺已崢嶸貧病賞明
月更無絲竹聲但言此夜好已完看月情始知天有月不
爲貧病明

卧病旬日未已閒書所憶

此地那堪再度年此身慚愧在鐙前夢中失哭兒呼我天
未招魂鳥降筵好友多從忠節傳人情不盡絕交篇於今
屈指幾回死未死猶然被病眠
劫火燒餘此病身更無思慮染秋塵打鐘掃地今行者阮
哭穡狂僕恨人風浪滿庭閑暮日鶯花極目坐芳辰靜中
探得眞消息只覺於今萬物親

十一月二十八日大雪

爲說他年雨雪時數番眞足繫追思長安貂帽旗亭酒樊
榭芒鞋古寺詩冰柱千尋逢洞口桃花萬樹壓湖湄于今
垂老荒村裏布被蒙頭不出楮

正月晦日同澤望至草庵與克歸話舊

風篁窈窕樵人路初闢叢林洞下宗牆角梅花五六樹窗
前積雪兩三峯弁山諸老吾親見畫壁蒼顏喜再逢慚愧
廿年塵上老始聞嗣法有渠儂

花朝宿石井

繩穿憶得去年事慚愧高樓聽落湍紅燭猶嫌寒話短竹
雞亦道路行難相看白鬢經三世耐得青松此兩山感慨
便成孤負卻銅丸錢汁是常餐

廿年曾宿溪山路枕上仍前徹夜風清氣不容塵外慮好

詩多在月明中花前聞鳥聲偏亂兵後持杯淚易濃珍重
西窗書甲子續游何日翦燈紅

讀上蔡語錄上蔡家極有好硯後盡舍之一好硯亦

與人慨然賦此

有宋上蔡謝先生一硯不留磨破瓦要使胸中自廓然世
間何物更難捨而吾平生玩物心擾擾無殊于野馬忽然
北風捲土去不名一錢在屋下突兀三硯真奇物天將史
筆委之野一硯龍尾從西土傳之朗三宣城梅傳之我燕

臺頤洞風塵中留之文虎雨上亦姑且十年流轉歸雪交

余書室名治亂存歿淚堪把一硯活眼暈九重秋水時向

雪交亭明窗瀉丁子王作合玉硯千祀古文出亡社三硯縱橫傍

短檠雪屋無煙亦瀟灑昔年送女人甬東穴壁偷兒不相

假吾時聞之在中途欲行不前奈兩蹠嬌兒阿壽恐吾傷
乞得滑硯強吾寫吾爲阿壽勉強笑握筆終然多牽惹開
卷今見上蔡事使我愧汗如盛夏丈夫力不能自割偷兒
眞爲益我者兒亡三載硯四年有賊不向貧家打

七夕夢梅花

梅花獨立正愁絕冰纏霧死卧天闕孤香半落護殘枝不
隨飄墮四更月新詩句句逼空濛嫣然一笑隔林樾有如
高士白雲表牛矢煙消山雪合一生寒瘦長鏡句伸頭窺
天亦半缺誰寄山瓢落葉中嚙向梅花同傲兀已上六韻
夢中作瓜舍驅豬方矻矻牀頭摸衣境過清不謂三伏猶
未卒始知此夜梅花詩未與炎景相唐突

王仲攜侍御過龍虎草堂

十年有五驚彈指又復煩君入剡中斜日蜂喧蕎麥路斷
雲犬吠瀑花東相看髯鬢都成雪豈料乾坤尙在籠應是
未還車馬債枉教南北徧游蹤

剡湖豈是乏茅蓬那得君來住此中百卷緯書真絕學千
秋國史附江東古松流水宵移算紅藥青櫺曉負籠方伎
儒林憑位置誰知世外有行蹤

壬寅二月遇火次陶韻

長松縛茅宇亂石開南軒夜半有明燭停午無煙燔三載
鏤頭滑花藥滿春前坎止復流行心跡異方圓年荒避盜
賊舊居姑且還春風吹野火紅燄漲遙天新詩焦泥壁老
樹天長年頽圍寒瀑響土銼月中閒遂令長往計牢落難
貞堅故書出破中葉葉如荷田惜此復幸此不廢食與眠

吾嘗嘗遺山賣書乃買園

五月復遇火

局促返舊居雞犬共一軒縮頭牀下雨眯眼竈中燔南風
怪事發正當子夜前排牆得生命再拜告九圍臣年已五
十否極不終還發言多冒人舉足輒違天半生濱十死兩
火際一年莫言茅屋陋賓客非等閒鬼目不相闚而遜華
堂堅其理不可解辨說空田田昨者劉伯繩爲我不安眠
僕本方外人豈終保邱園

興徐昭法

人傳徐昭法可聞不可見我今上靈巖鐘鼓集法眷相看
盡陳人不參以時彥徐子最後來布袍巾幅絹儲公覽拙
文珍重壓端硯徐子翻讀之喟然而稱善謂是震川後敘

事無人薦虞山加粉澤可謂不善變落此一瓣香百年如
靚面出其論文書并與他著撰體裁既整齊字句亦工練
夜坐天山堂諸家評畧徧人言子寡言子言如竹筧乃知
世知子猶爲子之羨

十二月二十二日夢汪魏美

湖上游蹤已數年夢中相遇在開先幅巾酒量曾如舊僧
舍寒鐙何處眠湖海故人將盡矣風波此老尙巍然那堪
出入如相避孤負山陰雪後船

蒼水

廿年苦節何人似得此全歸亦稱情廢寺釀錢收棄骨老
生禿筆記琴聲遙空摩影狂相得羣水穿礁浩未平兩世
雪交私不得只隨眾口一閒評

八月小盡接家書有感

秋深昏曉異溫涼靜坐南牕白日長青鏡絲絲添鬢白家
書歲歲說年荒摩按老腳登嵩華堆疊沙鍋煮雪霜此願
此生猶未遂問誰挽汝落塵糠

擎拳豎腳此蒼天慚愧何曾讓昔賢一擊便當千里近孤
身只合萬山巔握中算子饒王伯筑裏新聲雜鐵鉛斯意
今人無會取故令花草得嫣然

飲洋溪

重九已過五日強菊花消息在茅堂江山此處無兵馬紅
紫階前正豔陽甲子差年皆慶厯永和一會盡清狂籬邊
不惜分攜去借得寒餓木柄長

尋張司馬墓

草荒樹密路三义下馬來尋日色斜
頑石嗚呼都作字冬青憔悴未開
花夜臺不敢留眞姓萍梗還來醉
晚鴉牡蠣灘頭當日客茫然隔世
數年華

送萬季野北上

三疊湖頭入帝畿十年烏背日光
飛四方聲價歸明水一代賢奸托
布衣良夜劇談紅燭跋名園曉色
牡丹旂不知後會期何日老淚縱
橫未肯稀

青藤歌

文長曾自號青藤青藤今在城隅
處離奇輪囷歲月長猶見當年讀
書意憶昔元美主文盟一捧珠盤
同受記七子五子廣且續不放他
人一頭地踽踽窮巷一老生倔强
不肯從世議破帽青衫拜孝陵科
名藝苑皆失位叔考院本

供排場

史槃字叔考以院本行世

伯良紅闥咏麗事

伯良名驥德紅闥詩和者甚眾

弟

子亦可長黃池不救師門之顛顛豈知文章有定價未及

百年見眞僞光芒夜半驚鬼神卽無中郎豈肯墜余嘗山
行入深谷如此青藤亦累累此藤苟不遇文長籬落糞土
誰人視斯世乃忍棄文長文長不忍一藤棄吾友勝吉加
護持還見文章如昔比

過法相寺

不到名藍數十年重來風景覺蕭然山中幸喜存長厯劫
冷能留不壞煙

先忠端公祠堂落成王明府嵩伊命廣文沈令辰攝

二月丁祭

昔年西石一茅亭多少名賢口血成待得奄兒咋舌死不

能兵火又支撐

燈暗香銷四十年不妨破屋帶林泉
西山之薇汨羅水便是招魂第一篇

黃竹浦間幾劫灰祠門正對舜江開
土人不識忠魂返但訝天邊雪浪來

一瓣香來自紫宸風和日美廟堂新
野人爭說前朝事赴獄當年亦丙寅

膝下拋離六十年音容只在夢魂間
望來未必能相似尙有憐兒舊日顏

先公被逮詩有中官弟姪皆遺廢孤孽何曾敢有兒之句

過塔子嶺

西風颯颯捲平沙驚起斜陽萬點鴉
遙望竹籬煙斷處當年曾此看桃花

陸世儀字道威號剛齋又號桴亭太倉人明諸生門人

私諡尊道先生亦曰文潛先生從祀孔廟有桴亭集

詩話桴亭年十二能詩歌其父振吾命題百鳥朝鳳
圖應聲日獨向高岡擇木棲更無鷓鴣與相齊一聲
叫徹虞廷日四海鳴鶴不敢啼十七歲與同里陳言
夏定交招盛聖傳錢蕃侯過在茲輩爲文會言夏序
其詩謂古風取材漢魏近體得法李唐弱冠以後潛
心明體達用之學詩歌非其大志所存間一有作則
能抒寫其中之所獨得而爲尋常思慮之所不及平
日論詩以三百篇爲主故一字一句必有合於典觀
羣怨之旨非若世之以剽竊詞華擬議聲病爲能者
中年遭值國變憂愁幽思時近離騷然淋漓感慨之
中仍不失溫柔敦厚之義則又足徵其學養也

感遇詩

潛魚懷深淵飛鳥慕青冥志尙各有適羅弋紛四陳神龍

失雲霧螻伏同眾鱗哲士無勢位俯首齊凡民仰歎發浩

歌悲來痛填膺氣數苟在天匹夫豈能爭時子遊地水村
土人亂復入城

仲雍避荆吳斷髮文其身殷箕遘昏亂佯狂受奴髡少連
柳下惠降辱稱逸民微服過宋都去衣入保人在昔大聖
詰處困皆有倫區區卑賤子含垢安足嗔伏讀明夷卦悠
然感我心柔順以蒙難艱貞晦其明

躡馬恆破車惡婦恆破家冠幘事攻劫安能正奇袞漢家
四百載黨禍爲萌芽處士盛名節朝廷非所嘉名節尙不
可何況羣驕奢

睢陽四戰地孤立賊壘中屹然障江淮不與降醜同茶紙
鼠雀盡身死城亦空巡遠固足欽斯民實奇忠河北廿四
郡聞之甯愧衷

江南連城相抗然能死戰死守
力盡不屈者惟江陰一邑而已

小隱隱陵阿大隱隱朝市朝市我不能陵阿亦殊贅卜居
東南隅落落有爽氣左顧通人煙右覽接荷芰平疇繁嘉

蔬古塚出高樹雖非山林間亦有泉石致一塵聊自息治
亂委人事

丹穴有雛鳳乃在山之陰青變白鶴侶朝夕相和鳴養此
羽毛奇翩然備儀庭明王閭不作海宇羣沸驚鸞鶴紛翻
飛鴟鴞互縱橫孤鳳何所之歛翮避逡巡豈無德輝著時
窮非炫珍靈龜曳其尾雄雞憚爲牲祥麟出周季將貽田
父禽

仲尼千載師偃蹇生衰周孟軻談王道七雄非其儔濂洛
關閩儒學至君未求晦翁振絕續南渡時蒙羞嗟魯齋
公仕元以爲尤豈天靳斯文每出多邈邈展卷仰前哲浩
然忘我憂

漁陽鼙鼓驚征塵動地起河北多郡縣一朝盡風靡常山

有太守慟哭整軍士誓心匡社稷志烈身竟死長樂何如
人紆紆佩金紫

同爲黨人同爲名士或生或死忠佞頌殊可爲浩歎

平生寡交與與世殊淡漠天涯有數子相知在寥廓或如
孔程交或辨朱陸學或聞聲相思曾未接酬酢遙遙南北
海此心契如約風塵暗天來蹤跡各飄泊出處或可期生
死殊未卜會晤當何時六合庶開拓

仲冬霜雪降寒月光逾涼獨夜起徘徊矯首中庭望三垣
何闇汶列宿縱橫行天狼射丸丸舒光異平常旄頭當天
明弧矢弛不張天道不可知歎息徒徬徨

春日田園雜興

牆角春風吹棣棠菜花香裏豆花香看魚獨立小池影數
荀閒行竹篠長白眼望天非是醉科頭混俗若爲狂莫嫌

世外人疎放彭澤情深勝沅湘

聞說山中好問津桃花如夢水如塵乍看幕燕成新壘誰

憶泥牛換早春

時新厯先舊厯二日

打鼓吹簫今歲社更衣脫帽舊

時人門前柳色依然綠陶令年來避葛巾

一夜東風春雨賒起看流水入溝斜籬頭未下絲瓜種牆

腳先開蠶豆花穉子鑿池浮乳鳴老翁攤箔晒新蝦已知

身世無餘樂聊爾徜徉未是差

春社纔過雨水中灌園初學問山翁新成芥辣旋栽苣既

落瓜壺不用葱衣履已知非晉代蠶桑聊自說幽風高原

小麥青青秀不見歌聲起故宮

野水灘頭長荻芽池塘處處起鳴蛙一春多雨占三白二

月無茶摘五加寒食沓來驚漢臘塞歌時起接邊笳春郊

風景還如舊添得傷心是短髮

舍北村南雨又晴倦拋書卷漫遊行山鳩逐婦每雙喚蒼
鼠窺人時獨驚種秫擬成千日酒醅菘聊當一春羹月泉
甲子依稀是讀罷遺編淚暗傾

遙哭希聲錢公

公婁舊令也申酉之難間關嶺海卒
死王事葬海中琅琪山其弟肇一兼

三負遺書至婁因
賦二律以誌墓思

中原傾覆事如何窮海孤臣強負戈利鈍由天非所計鞠
躬自我更無他流離尙欲書章句疾革猶聞喚渡河正氣
如公那可滅濤聲隱隱似悲歌

營頭夜隕海濤奔眞宰茫茫未可論絕島君臣留正朔瘴
天風雨葬忠魂誰將心事傳龍比賴有遺書屬弟昆千古
崖山成恨事臨風遙慟一傾樽

送閩中林衡者遊中原長歌

石齋先生天下師，君能弱冠長揖之。著書如風腕欲脫，吐
論鑿鑿稱雄奇。石齋爲君亦拱手，略盡形骸呼小友。贈君
藥言送君詩，直欲與君分半畝。

石齋先生贈君之詩中有
句云：應分半畝與君居。

天公天公何不仁，忠臣餓死英雄貧。嶺雲如山戰骨白，至
今閩海飛征塵。男兒致身苦不早，雙鬢蹉跎渾欲老。安能
局促轅下駒，鳳凰翱翔在蒼昊。束書躡屩作壯遊，志氣直
欲凌九州。扁舟千里入吳會，上書論古驚同儔。腐儒如予
那足道，感君意氣爲傾倒。揮毫贈我琅玕辭，愧乏瓊瑤無
以報。君今策蹇問中原，山川漫漫道路昏。胡琴欲碎向何
處，夜半起舞心煩。究金陵城中王氣盡，蔣山斷樹生芝菌。
日落江潮慘不波，維揚明月歌春蚓。君不見昔日江東祖。

士雅擊楫中流淚盈把又不見遼東阜帽翁語維經典甘
孤窮丈夫處世只兩途吾子坎壈將安終中原人才頗不
惡風塵往往傾然諾昂藏七尺未長貧暗中定可相摸索
歸來好復過桴亭西窗剪燭閒短屏交知四海見吾子相
對使人雙眼青

喜宋子猶從上海歸賦贈

十年蹈海一身輕故國重回代已更夢裏鯨波如昨日尊
前鮭菜只平生乾坤何處容孤往邱壑吾儕且耦耕遜世
工夫正無限可能相助一經營

重陽後一日含綠堂吟社雅集分韻得七虞

茱萸插罷酒還沽餘興龍山尙未孤萬古乾坤皆草莽一
時人物在菰蘆月泉開社天星聚鐵匣緘詩井水枯字內

誰成三不朽壯心空老北山愚

甌山士

越甌底山有鄉塾師亡其姓氏丙戌之役與鄉人約曰吾不復食矣當括埋我若等爲我

備兩缸覆之鄉人給曰諾越日索缸鄉人遂置之

猶以爲戲也先生於山陽命開擴置缸端坐令封

好鄉人果覆之又越日鄉人呼曰先生先生曰諾

五日皆應至六日遂絕聲越人稱之曰甌山高士

雲門梵林述其事係之以詩并來索和爲作甌山

首士一

甌山士甌山士甌底山頭授書史人生何用讀五車但須

一識忠孝旨輟車北來飲江水金鳧銀雁飛都市越國風

塵高蔽天兩缸覆我甌山前上有碧落下黃泉冥冥長夜

年復年普天絕無乾淨地甌山猶存土一簣

張履祥字考夫號念芝桐鄉人明諸生從祀孔廟有楊

園詩集

江子屏曰考夫明季諸生幼孤貧不能就外塾其母授以四子書及長從劉忠介公游明亡教授里中著經正錄揚園備忘錄其學以鹿洞爲宗所著之書切於日用是時主講者多不務己徒騁口辯深疾其所爲不敢亢顏爲師來學者一以友道處之頗能詩秀水朱彝尊稱其詩無頭巾氣云詩話揚園踐履篤實所學務在躬行嘗言凡人祇有養德養身二事教學則閒卷有益可以養德通功易事可以養身又謂治生以稼穡爲先刊補漣川沈氏農書於初學備忘訓子語中諄諄以耕讀二字教後人晚年寫寒風竝立圖以見志自題云行己欲清恆入於濁求道欲勇恆病於怯噫君之初志豈不亦曰古之人古之人老斯至矣其彷彿乎何代之民著述甚多歟後百數十年乃大傳於世存詩一卷音旨和雅亦見

寓託

和程巽隱先生惜日短詩

木葉改榮落相將又一年所業未殊昔徒爲悲逝川初謂不復爾漸至乃依然聞道果何日詩書自簡編春秋三十六不久成華顛攬衣起徘徊明發期先鞭

感遇

自昔墾硯田力疲鮮所獲今茲受草萊朝暮不遑適反覆
已四三根盤匪易闢筋骨豈嘗愛鎡基未之惜嘉種無新
機莠勢轉充斥自分農家流服勤乃長策水旱會有時螯
賊數庸戾惟願苗畝成主伯蒙其益亦令繼自今動免怨
疆場敢希樂郊人歲取禾三百

長途望不極白日亟西馳敝車駕羸馬僕夫力已疲故人
意欵曲執手語移時壺飧陳道左復申以多儀多儀自古
重壺飧奚獨私饑渴非不慰所憂道逶迤暝色接衣袂惘
惘其安之終焉悔靡及云何人躊躇

同遊不同意

鴻鵠舉四海雁鶩爭稻梁豈不號同羣所願非一方

歎馬二絕贈趙公簡

海內無爭戰，芳郊騁薄蹄。
何顏隨朔產，昂首學長嘶。
豈有千里心，所戚惟窮老。
屢鞭腹自饑，躑躅悲荒草。

宿山中

明月不改色，青山留舊顏。
故人零落盡，卧聽水潺潺。

野步

芳草紛紜藉麥苗，餘紅閒雜柳枝條。
漁舟半出犀溪右，板擊聲聲過野橋。
犀溪予家北

聞禽

寒光已逗人，慵起雞聲未。
已烏聲催凡物，有知皆樂且因。
思百蟄候行雷。

和橙齋種菜詩

處世無如用拙尊閒庭讀易蝨初捫五更清夢迴來穩汲
水朝畦齧菜根

老圃秋容徑欲斜晚菘新韭長抽芽經過白雪青霜候許
有西田好種瓜

顏元初名園字渾然號習齋博野人諸生初爲朱姓名

邦良後歸宗門弟子私謚文孝先生從祀孔廟

錢東生曰習齋明季父成遠東衛卒於戍所徒步數
千里至關外覓父骨歸葬論學以清克潔慈自爲一
家之說立爲學次第雜取少儀內則諸篇定幼學之
準而以禹謨周官經所云六府三事三物爲節目
詩話習齋著書繁富其要旨則在存人存性存學存
治陸桴亭學重六藝習齋喜其同志更躬行實踐以
昌大之嘗謂宋人好言習靜今日正當習動蓋其學
以經世爲宗切實可行不囿於漢宋家言余服膺顏
李之學曾作兩先生語要及師承記比年京師設四
存學會附設四存學校復彙刻顏李叢書聞風興起
弔趙處士瑑墓處士卒時
白虹貫日

孝友清高素慕君神交未遂范張心白虹貫日當年事遂
拜孤墳憑弔深

題荆軻山

峯頂浮屠掛曉晴當年匕首入強嬴燕圖未染秦王血山
色於今尙不平

美人歌

開封城內見一少年甚偉問其姓名沽酒與飲叩其志果不凡半醉起舞爲之歌

八月秋風凋白楊蘆荻蕭蕭天兩霜有客有客夜徬徬徬
徬良久鸚鵡舞雙眸炯炯空千古紛紛世儒何足數直呼
小兒楊德祖尊中有酒盤有餐倚劍還歌行路難美人家
在青雲端何以贈之雙琅玕

晚晴移詩匯卷十一終